

四庫全書

史部

欽定四庫全書

史部

水經注釋卷

三十九
四十

詳校官監察御史

臣

周元良

刑部郎中

臣

許兆椿覆勘

總校官降調編修

臣

倉聖脉

校對官編修

臣

周與成

謄錄監生

臣

陳繼

欽定四庫全書

水經注釋卷三十九

仁和趙一清撰

洹水

深水

鍾水

耒水

洙水

澆水

瀏水

潁水

贛水

廬江水

洹水出桂陽縣廬聚

一清按余俗本洹俱作滙誤也說文滙器也从匚淮聲尚書禹貢東

匯澤為彭蠡孔傳曰滙迴也釋文曰徐胡罪反韋空為反別無水出桂陽之說又說文滙水出桂陽縣廬聚出

滙浦關為桂水从水匿聲去王切與水經合予宿疑水
 經滙水標題與下舍滙字義不符觀叔重之書始知後
 來傳寫之誤班志桂陽縣滙水南至四會入鬱林過郡
 二行九百里應劭曰桂水所出東北入湘舍滙縣應劭
 曰滙水所出東北入沅今水經不言滙水所入之處漆
 水篇云過潯陽縣入滙浦關與桂水合南入于海注云
 漆水又南注于鬱而于海是桂水與漆水俱注于鬱
 而入海與班志昭合臨武縣下又云秦水東南至潯陽
 入滙師古曰滙胡賄反蓋滙與桂音相近而與滙形似
 滙水即桂水亦即滙水道元所謂山海經謂之湟水桂
 水其別名者是也滙集韻曰本作滙隸省作滙漢書作
 滙今作滙蓋因避宋太祖諱匡缺筆作匡而誤作滙耳
 漆水注黃本作汪水亦即滙字之訛誤故應劭以桂水
 釋桂陽滙水釋舍滙而不別出滙水最為得解史記南
 越傳云移檄告橫浦陽山湟溪關裴駘集解云徐廣云
 在桂陽通四會也索隱曰鄒氏劉氏本湟並作湟音年

結反漢書作湟溪音皇又衛青傳云出桂陽下湟水姚
察曰史記作匯今本有湟湟及匯不同蓋由隨見輒改
故也水經云含匯縣南有匯浦關未知孰是然鄒誕作
湟漢書作湟蓋近于古今考水經惟篇首作匯字下含
匯縣匯浦關皆作匯小司馬以漢水湟字為近古得之
矣若作匯字去湟音益遠更作湟字尤無所據字經三
寫魯變為魚信矣九域志云開寶四年改含匯縣為含
光避太祖諱也可知至宋猶仍匯水之稱匯字之誤審
矣全祖望曰水經作匯與說文合若匯則匯之似而訛猶之湟
水經又作桂亦與說文合若匯則匯之似而訛猶之湟
則湟之似而譌也而又有作灌水者則桂音之近而譌
道元特起而糾之今本灌又轉誤作難益不足辨矣

水出桂陽縣西北上驛山盧溪為盧溪水東南流逕
桂陽縣故城謂之匯水地理志曰匯水出桂陽南至

四會是也。涯水又東南流出桂陽南，至四會，是嶠之溪。溪水下流，歷峽南出，是峽，謂之貞女峽。峽西岸高，巖名貞女山。山下際有石，如人形，高七尺，狀如女子，故名貞女峽。古來相傳有數女，取螺于此，遇風雨，晝晦，忽化為石。斯誠巨異，難以聞信，但啓生石中，擘爪空桑，抑斯類矣。物之變化，寧以理求乎？溪水又合涯水，涯水又東南入陽山縣，右合漣口，水源出縣西北一百二十里石塘村。村之流水側有豫章木，本還可。

二丈其株根猶存伐之積載而斧跡若新羽族飛翔
不息其傍衆枝飛散遠集鄉亦不測所如唯見一枝
獨在舍漚水矣漚水東南流注于漚漚水又東南流
而右與斟水合水導源近出東巖下穴口若井一日
之中十溢十竭信若潮流而注漚水漚水又南逕陽
山縣故城西耆舊傳曰往昔縣長臨縣輒遷擢超級
太史逕觀言城勢使然掘斷連岡流血成川城因傾
陀遂即傾敗閣下大鼓飛上臨武乃之桂陽追號聖

鼓自陽山達乎桂陽之武步驛所至循聖鼓道也其道如塹迄于鼓城矣沅水又逕陽山縣南縣故舍沅縣之桃鄉孫皓分立為縣也沅水又東南流也

東南過舍沅縣

應劭曰沅水東北入沅澧注漢書沅在武陵去沅遠又隔湘水不得入沅沅水東南左合翁水水出東北利山湖湖水廣圓五里潔踰凡水西南流注于沅謂之翁水口口已下東岸有聖鼓枝即陽山之鼓枝也

橫則川側雖衝波所激未嘗移動百鳥翔鳴莫有萃
者船人上下以篙撞者輒有瘡疾沔水又東南左合
陶水水東出堯山山盤紆數百里有赭岩迭起冠以
青林與雲霞亂綠山上有白石英山下有平陵有大
堂基者舊云堯行宮所陶水西逕縣北右注沔水沔
水又逕舍沔縣西王歆之始興記曰縣有白鹿城城
南有白鹿岡咸康中郡民張魴為縣有善政白鹿來
遊故城即岡並即名焉

南出沅浦關為桂水

關在中宿縣沅水出關右合溱水謂之沅口山海經謂之湟水徐廣曰湟水一名沅水出桂陽通四會亦曰湟水也漢武帝元鼎元年路博德為伏波將軍征南越出桂陽下湟水即此水矣桂水其別名也

深水

一清按深說文作澁

出桂陽盧聚

呂忱曰深水一名遂水導源盧溪西入營水亂流營波同注湘津許慎云深水出桂陽南平縣也經書桂

陽者縣也本隸桂陽郡後割屬始興縣有盧溪盧聚山在南平縣之南九疑山東也

西北過零陵營道縣南又西北過營浦縣南又西北過泉陵西北七里至燕室邪入于湘

水上有燕室邱亦因為聚名也其下水深不測號曰龍泉

鍾水出桂陽南平縣部山北過其縣東又東北過宋渚亭又北過鍾亭與淮水合

部山即部龍之嶠也五嶺之第五嶺也

一清按後漢書吳佑傳章

懷注引南康記曰五嶺南康大庾一也桂陽甲騎二也九真都龐三也臨賀萌渚四也始安越嶠五也廣

州記則以為大庾一始安二臨賀三桂陽四而以九真為揭陽合為五嶺是注所言五嶺之次與鄧記合

第考班志九真郡有都龍縣應劭曰龐音龍師古曰音龍而桂陽之部龍乃嶺嶠之名王象之輿地紀勝

曰山之絕頂曰都達土人語訛曰龐也不知都部字相似龐龍音相連而強以都達為土音山之絕頂之

說殆因嶺嶠而傳會邪此與九真之都龐鍾水即嶠縣無涉鄧記誤也當以南平部龍為是

水也庾仲初曰嶠水南入始興淮水

一清按來水篇引庾說作始興

溱水蓋溱水出沅浦關與桂水合也

注于海北

一清按來水篇引庾說北字下多一水字入

桂陽湘水注于江是也灌水即桂水也灌桂聲相近
故字隨讀變經仍其非矣桂水出桂陽縣北界山山
壁高聳三面特峻石泉懸注瀑布而下北逕南平縣
而東北流屈鍾亭右會鍾水通為桂水也故應劭曰
桂水出桂陽東北入湘

又北過魏寧縣之東

一清按續志桂陽郡漢寧縣永和元年置吳改曰陽安晉改曰晉寧

宋以後因之無魏寧也此如廣魏興之類通元蓋併經而改之

魏寧故陽安也晉太康元年改曰晉寧縣在桂陽郡

東一百二十里縣南西二面岨帶清溪桂水無出縣
東理蓋縣邑流移今古不同故也

又東北入于湘

耒水出桂陽郴縣南山

耒水發源于汝城縣東烏龍白騎山西北流逕其縣
北西流三十里中有十四瀨各數百步濬流奔急竹
節相次亦為行旅溯步之艱難也又西北逕晉寧縣
北又西左合清溪水口水出縣東黃皮山西南流歷

縣南又西北注于耒水汝城縣在郡東三百里餘山
又在縣東無出南山理也

又北過其縣之西

縣有淶水出縣東俠公山西北流而南屈注于耒謂
之程鄉溪郡置酒官醞于山下名曰程酒獻同鄴也
耒水又西黃水注之水出縣西黃岑山山則騎田之

嶠

一清按南康
記作甲騎

五嶺之第二嶺也黃水東北流案咸

宏之云衆山水出注于大溪號曰橫流溪溪水甚小

冬夏不乾俗亦謂之為貪泉飲者輒冒于財賄同于
廣州石門貪流矣廉介為二千石則不飲之昔吳隱
之挹而不亂貪豈謂能污其貞乎蓋亦惡其名也劉
澄之謂為一涯溪通四會殊為孟浪而不悉也庾仲
初云嶠水南入始興濠水注海即黃岑水入武溪者
也一清按黃岑曲紅碑作王禽北水入桂陽湘水注于大江即是
水也又側千秋水注之水出西南萬歲山山有石室
室中有鍾乳山上悉生靈壽木溪下即千秋水也水

側民居號萬歲村其水下合黃水黃水又東北逕其
縣東右合除泉水水出縣南湘陂村村有圓水廣圓
可二百步一邊暖一邊冷冷處極清綠淺則見石深
則見底暖處水白且濁元素既殊涼暖亦異厥名除
泉其猶江乘之半湯泉也水盛則瀉黃溪水耗則津
涸輟流郴舊縣也桂陽郡治也漢高帝二年分長沙
置地理志桂水所出因以名也

一清按今漢志桂陽郡無此語此是應劭

注在桂陽縣下
殆道元誤記也

王莽更名南平縣曰宣風其城項羽

遷義帝所築也縣南有義帝冢內有石虎因呼為白
虎郡東觀漢記曰茨充字子何為桂陽太守民惰懶
少麓履足多剗裂茨教作履今江南知織履皆充之
教也黃溪東有馬嶺山高六百餘丈廣圓四十許里
漢未有郡民蘇耽棲游此山桂陽列僊傳云耽郴縣
人少孤養母至孝言語虛無時人謂之癡常與衆兒
共牧牛更直為帥錄牛無散每至耽為帥牛輒徘徊
左右不逐自還衆兒曰汝直牛何道不走耶耽曰非

汝曹所知即面辭母云受性應僊當違供養涕泗又
說年將大疫死者畧半穿一井飲水可得無恙如是
有哭聲甚哀後見耽乘白馬還此山中百姓為立壇
祠民安歲登民因名為馬嶺山

朱氏謀瑋箋云無恙

云耽初去時云今年大疫死者畧半家中井水飲之
無恙果如所言闔門元吉母年百餘歲終鄉人共葬
之聞山上有人哭聲服除乃止神仙傳曰耽母既終
葬後州東北牛脾山紫雲蓋上有號哭聲知蘇君之
神因見白馬常在嶺上黃水又北流注于耒水謂之
遂改牛脾山為白馬嶺

柳口耒水又西逕華山之陰亦曰華石山孤峯特聳

枕帶雙流東則黃溪耒水之交會也耒水東流沿注
不得北過其縣西也兩岸連山石泉懸溜行者輒徘徊
留念情不極已也

又北過便縣之西

縣故惠帝封長沙王子吳淺為侯國

全氏曰按漢表以為江夏之編

索隱曰縣屬桂陽當從道元為是淺以惠帝元年封

王莽之便屏也縣界有溫

泉水在郴縣之西北左右有田數十畝資之以溉常

以十二月下種明年三月穀熟度此水冷不能生苗

溫水所溉年可三登其餘波散流入于耒水也

又西北過耒陽縣之東

耒陽舊縣也蓋因水以制名王莽更名南平亭東傍耒水水東肥南有郡故城縣有溪水東出侯計山其水清澈冬溫夏冷西流謂之肥川川之北有盧塘塘池八頃其深不測有大魚常至五月輒一奮躍水湧數丈波褭四陸細魚奔迸隨水登岸不可勝計又云大魚將欲鼓作諸魚皆浮聚水側注西北逕蔡州州

西即蔡倫故宅傍有蔡子池倫漢黃門順帝之世搆
故魚網為紙用代簡素自其始也

又北過鄆縣東

縣有鄆湖湖中有洲洲上民居彼人資以給釀酒甚
醇美謂之鄆酒歲常貢之湖邊尚有鄆縣故城治此
西北去臨承縣一十五里從省隸十三州志曰大別
水南出耒陽縣太山北至鄆湖入湖也

北入于湘

耒水西北至臨承縣而右注湘水謂之耒口也

沘水出茶陵縣上鄉西北過其縣西

水出江州安成郡廣興縣太平山西北流逕茶陵縣

之南

名勝志衡州府酃縣下云沘水源出沘泉注水經云泉不常見遇邑政清明年穀豐稔其泉漸

然如米泔瀑湧耆舊相傳疾者飲此多愈今本無之一清按今酃縣本漢茶陵縣地名嘉定四年置非漢

之酃縣也漢武帝元朔四年封長沙定王子節侯訢之邑

也一清按史表作欣此從漢表師古曰訢與欣同王莽更名聲鄉矣沘水又

屈而過其縣西北流注也地理志謂之泥水者也

又西北過攸縣南

攸水出東南安成郡安復縣封侯山西北流逕其縣

北縣北帶攸溪蓋即溪以名縣名漢武帝元朔四年

封長沙定王子則為攸興侯

一清按索隱曰按今長沙有攸縣本名攸興乎

表在南陽小司馬蓋本之酈注

即地理志所謂攸縣者也攸水又西

南流入茶陵縣入于洙水也

又西北過陰山縣南

縣本陽山縣也縣東北猶有陽山故城即長沙孝王

子宗之邑也

一清按漢表宗以元帝永光二年封

形家言其勢王故塹

山堙谷改曰陰山縣

一清按漢志桂陽郡有陽山縣又有陰山縣皆云侯國至續志

有陰山無陽山蓋東京省併之故應劭曰陽山今陰山也而師古以應說為非殆未詳攷也宋志云陰山今漢舊縣屬桂陽吳湘東郡有此疑是吳所立沈約所云亦非也孫吳所立是湘東郡而度桂陽之陰山縣隸之故晉志湘東郡有陰山縣

陰山縣

未嘗廢省何容復立乎

縣上有容水自侯

曇山下注洙水謂之容口水有大穴容一百石水出

於此因以名焉洙水又西北逕其縣東又西逕歷口

縣有歷水下注洙水謂之歷口洙水又西北與洋湖

水會水出縣西北樂藪置下洋湖湖去置七里湖水
下注洙謂之洋湖口洙水東北有峨山縣東北又有
武陽龍尾山並僊者羽化之處上有僊人及龍馬跡
於其處得遺咏雖神栖白雲屬想芳流籍念泉鄉遺
咏在茲覽其餘誦依然息遠匪直邈想霞蹤愛其丈
咏可念故端牘抽札以詮其咏其畧曰登武陽觀樂
藪峨嶺千蕤洋湖口命蜚螭駕白駒臨天水心踟躕
千載後不知如蓋勝賞神鄉秀情超拔矣

又西北入于湘

澧水出醴陵縣東澧山西過其縣南

醴陵縣高后四年封長沙相侯越為國縣南臨淶水
水東出安城鄉翁陵山余謂澧淶聲相近後人藉便
以淶為稱雖翁陵名異而即麓是同

屈從縣西西北流至澧浦注入于湘

瀏水出臨湘縣東南瀏陽縣

一清按瀏陽縣本漢臨湘縣地孫吳析置以縣在瀏

水之陽故名據此亦經大晚出之一證全祖望曰三國志周瑜傳以下雋漢昌劉陽州陵為奉邑則劉陽自漢

未已有其名雖未為縣而已
為邑若作邑字于經為合

西北過其縣東北與潞溪

水合

潞水出縣東江州豫章縣首裨山

全祖望曰按顧祖禹曰今瀏陽之大

圃山即首裨山其水曰白沙湖分四派一入袁之萬載一入分寧一入岳之中江其一即瀏水予謂據顧說則經文所言是也善長誤以分寧之水當之不知首裨山不在豫章也導源西北流逕

其縣南縣憑溪以即名也又西北注于臨湘縣也

西入于湘

潞水出豫章艾縣

春秋左氏傳曰吳公子慶忌諫夫差不納居于艾是也王莽更名治翰

西過長沙羅縣西

羅子自枝江徙此世猶謂之為羅侯城也澗水又西流積而為陂謂之町湖也

又西至累石山入于湘水

累石山在北亦謂之五木山山方尖如五木狀故俗人藉以名之山在羅口北澗水又在羅水南流注于

湘謂之東町口者也

贛水出豫章南壄縣西北過贛縣東

山海經曰贛水出聶都山東北流注于江入彭澤西也班固稱南壄縣彭水所發東入湖漢水庾仲初謂大庾嶠水北入豫章注于江者也地理志曰豫章水出贛縣西南而北入江蓋控引衆流總成一川雖稱謂有殊言歸一水矣故後漢郡國志曰贛有豫章水雷次宗云似因此水為其地名雖十川均流而此源

最遠故獨受名焉劉澄之曰縣東南有章水西有貢水縣治二水之間二字合贛字因以名縣焉是為繆

也劉氏專以字說水而不知遠失其實矣

全氏曰按章貢圖經

曰東江發源于汀州界之新樂山逕雩都而會于章水西江導源于大庾縣之聶都山與貢水合二水合而為贛則微之之言未可非也如善長所引山經及庾說但有貢水而無章水恐未足以釋贛水之義也沈氏曰近世皆以豫章水為章水湖漢水為貢水所歷十八灘之險黃公灘為最即所謂惶恐灘也豫

章水導源東北流逕南壠縣北贛川石岨水急行難傾波委注六十餘里又北逕贛縣東縣即南康郡治

晉太康五年分廬江立豫章水右會湖漢水水出雩都縣導源西北流逕金雞石其石孤竦臨水耆老云時見金雞出于石上故石取名焉湖漢水又西北逕贛縣東西入豫章水也

又西北過廬陵縣西

廬陵縣即王莽之桓亭也十三州志稱廬水西出長沙安復縣武帝元光六年封長沙定王子劉昌為侯國即王莽之思成也

一清按漢書地理志長沙國安成縣侯國續漢書郡國志無之

蓋省併也吳復置晉太康元年改曰安
復王于侯表蒼封是安成非安復也
吳寶鼎中立
以為安成郡東至廬陵入湖漢水也

又東北過石陽縣西

漢和帝永平九年分廬陵立漢獻帝興平二年吳長
沙桓王立廬陵郡治此豫章水又逕其郡南城中有
井其水色半清半黃黃者如灰汁取作飲粥悉皆金
色而甚芬香

又東北過漢平縣南

一清按後漢中平中立漢平縣吳
改曰吳平此亦經文晚出之證

又東北過新淦縣西

牽水西出宜春縣漢武帝元光六年封長沙定王子

劉成為侯國王莽之修曉也牽水又東逕吳平縣舊

漢平也晉太康元年改為吳平矣

一清按宋志吳平侯相吳更名

牽

水又東逕新淦縣即王莽之偶亭而注于豫章水湖

漢及贛並通稱也又淦水出其縣下注于贛水

又北過南昌縣西

盱水出南城縣西北流逕南昌縣南西注贛水又有

濁水注之水出康樂縣故陽樂也

一清按宋志康樂侯相吳孫權黃武

中立曰陽樂晉武帝太康元年更名

濁水又東逕望蔡縣縣因汝南上

蔡民萍居此土晉太康元年改為望蔡縣

一清按劉昭郡國志

補注引豫章記曰上蔡縣中平立此地名上蔡者上蔡民分徙此地立名上蔡然則漢縣本名上蔡也

濁水又東逕建成縣漢武帝元光

沈氏曰按本表是元朔

四年

封長沙定王子劉拾為侯國王莽更名之曰多聚也

縣出然石異物志曰石色黃白而理疎以水灌之便

熱以鼎著其上炊足以熱置之則冷灌之則熱如此

無窮元康中雷孔章入洛賫石以示張公張公曰此
謂然石于是乃知其名濁水又東至南昌縣東流入
于贛水贛水又歷白社西有徐孺子墓吳嘉禾中太
守長沙徐熙於墓隧種松太守南陽謝景於墓側立
碑永安中太守梁郡夏侯嵩於碑傍立思賢亭松大
合抱亭世修治至今謂之聘君亭也贛水又北歷南
塘塘之東有孺子宅際湖南小州孺子名稚南昌人
高尚不仕太尉黃瓊辟不就桓帝問尚書令陳蕃徐

稚袁閔誰為先後蕃答稱袁生公族不鏤自雕至於
徐稚傑出薄域故宜為先桓帝備禮徵之不至太原
郭林宗有母憂稚往弔之置生芻於廬前而去衆不
知其故林宗曰必孺子也詩云生芻一束其人如玉
吾無德以堪之年七十二卒贛水又逕谷鹿州即蓼
子州也舊作大陂處贛水又北逕南昌縣故城西於
春秋屬楚即令尹子蕩師于豫章者也秦以為廬江
南郡漢高初六年始命灌嬰

一清按作
有脫文

以為豫章郡

治此即灌嬰所築也王莽更名縣曰宜善郡曰九江
焉劉歆云湖漢等九水入彭蠡故言九江矣陳蕃為
太守署徐稚為功曹蕃在郡不接賓客唯稚來特設

一榻去則懸之此即懸榻處也建安中更名西安晉

又名為豫章

一清按兩漢及晉豫章郡治南昌晉志豫章郡領豫章縣劉昭郡國志補注引

豫章記曰豫章縣建安立三國吳改曰西安故晉志豫章郡有豫章縣蓋復漢之舊也晉志不言豫章宋

志不記豫章均為脫漏且宋志云豫章太守領豫章侯相漢獻帝建安中立吳曰要安晉武帝太原元年

更名要安又是西安之誤吳書太史慈傳數為寇于父西安是也城在今武寧縣西二十里前漢為海昏

後漢為建昌縣地去南昌府城三百二十里非郡治也此注言豫章郡治而釋以西安疑庸妄人所填改觀下彭澤注城之南門曰松陽門門內有樟樹高七却甚分明

丈五尺大二十五圍枝葉扶疎垂蔭數畝應劭漢官儀曰豫章樟樹生庭中故以名郡矣此樹嘗中枯逮晉永嘉中一旦更茂豐蔚如初咸以為中宗之祥也禮斗威儀曰君政訟平豫樟常為生太興中元皇果興大業于南故郭景純南郊賦云弊樟擢秀于祖邑是也以宣王祖為豫章故也贛水北出際西北歷度

支步是晉度支校尉立府處步即水渚也贛水又逕

郡北為津步步有故守賈萌廟萌與安成侯張普爭

地為普所害即日靈見津渚故民為立廟焉

全氏曰賈萌事

太平御覽引謝承後漢書謂是討莽而死又引安成
記謂爭地而死然攷之漢書王莽傳則是為莽九江

太守拒漢而死其亦異矣豈同時先後之間有二賈
萌又皆為南州牧守耶一清按寰宇記洪州南昌縣

龍沙廟即西漢末太守賈萌也萌與安成侯張普共
謀誅王莽普反告莽收萌而殺之時人咸歎故為立

廟祭之事更詳核尤可與班書參異同也水之西岸有磐石謂之石頭津

步之處也西行二十里曰厭原山疊嶂四周杳邃有

趣晉隆安末沙門竺曇顯建精舍于山南僧徒自遠
而至者相繼焉西北五六里有洪井飛流懸注其深
無底舊說洪崖先生之井也北五六里有風雨池高
山高瀨激激著樹木霏散遠灑若雨西有鸞岡洪崖
先生來鸞所憩泊也岡西有鵠嶺云王子喬控鵠所
選過也有二崖號曰大簫小簫言簫史所游萃處也
雷次宗云此縈風捕影之論據實本所未辨聊記奇
聞以廣井魚之聽矣又按謝莊詩莊嘗游豫章觀井

賦詩言鸞岡四周有水謂之鸞陂似非虛論矣東大

湖十里二百二十六步北與城齊

周氏必大汎舟游山錄云徐孺子亭

在東湖徐宅名見水經又乾道庚寅奏事錄云東湖徐孺子亭洪躬職乘云湖在郡東南周廣五里鄴道元云十里一百二十步寰宇記引雷次宗豫章記曰州城東有大湖北與城齊一清按今又似有脫誤

南緣迴折至南塘水通章江增減與江水同漢永元

中太守張躬築塘以通南路魚過北水冬夏不增減

水至清深魚甚肥美每于夏月江水溢塘而過居民

多被水害至宋景平元年太守蔡君西起隄開塘為

水門水甚旱則閉之內多則洩之自是居民少患矣
贛水又東北逕王步步側有城云是孫奮為齊王鎮
此城之渚今謂之王步蓋齊王之渚步也郡東南二
十餘里又有一城號曰齊王城築道相通蓋其離宮
也贛水又北逕南昌左尉廨西漢成帝時九江梅福
為南昌尉居此後福一旦捨妻子去九江傳云得僊
一清按六贛水又北逕龍沙西沙甚潔白高峻而陀
字注中注
有龍形連亘五里中舊俗九月九日升高處也昔有

人於此沙得故冢刻碑題云西去江七里半筮言其吉卜言其凶而今此冢垂沒於水所謂筮短龜長也

贛水又逕椒邱城下建安四年孫策所築也

朱氏謀瑋箋曰

雷次宗豫章記云建安四年孫策破劉勲于潯陽欲謀取豫章太守華歆于郡下流一百四十里臨江築椒邱城以備之一清按然則椒邱城非策所築其後策駐軍于此以脅華歆遂以名之贛水又

歷釣圻邸閣下度支校尉治太尉陶侃移置此也校

尉豫章

全氏曰按校尉失其姓名

因運出

全氏曰出疑作朱

之力于渚次

聚石為州長六十餘丈州裏可容數十舫贛水又北

逕鄆陽縣王莽之豫章縣也餘水注之水東出餘汗

縣王莽名之曰治干也餘水北至鄆陽縣注贛水贛

水又與鄱水合水出鄆陽縣東西逕其縣南武陽鄉

也地有黃金可采

一清按漢志鄆陽縣下云武陽鄉右十餘里有黃金采師古曰采者

謂采取金之處可字是道元率筆誤加

王莽改曰鄉亭孫權以建安十

五年分為鄆陽郡鄆水又西流注于贛又有繚水入

焉其水導源建昌縣漢元帝永光二年分海昏立繚

水東逕新吳縣漢中平中立繚水又逕海昏縣王莽

更名宜生謂之上繚水又謂之海昏江分為二水縣東津上有亭為濟渡之要其水東北逕昌邑城而東出豫章大江謂之慨口昔漢昌邑王之封海昏也每乘流東望輒憤慨而還世因名焉其一水枝分別注入于脩水也

又北過彭澤縣西

脩水出艾縣南東北逕豫寧縣故西安也晉太康元年更從今名脩水又東北逕永脩縣漢靈帝中平二

年立脩水又東北注贛水其水總納十川同漚一瀆

俱注于彭蠡也

一清按漢志豫章郡彭蠡縣禹貢彭蠡澤在西廬江郡尋陽縣禹貢九江

在南皆東合為大江九江郡下應劭曰江自廬江尋陽分為九全祖望曰郡國志云贛有豫章水雷次宗

云十川均流此源最遠善長亦云贛水總納十川按漢志豫章郡贛縣下云豫章水出西南北入大江雩

都縣下云湖漢水東至彭澤入江行千九百八十里即注所謂豫章水右會湖漢水者也其十川漢志南

望縣下云彭水東入湖漢長沙國安成縣下云廬水東至廬陵入湖漢宜春縣下云南水東至新淦入湖

漢新淦縣下應劭曰淦水所出西入湖漢南城縣下云盱水西北至南昌入湖漢建成縣下云蜀水東至

南昌入湖漢餘汗縣下云餘水在北至鄱陽入湖漢鄱陽縣下云鄱水西入湖漢艾縣下云隋水東北至

彭澤入湖漢行六百六十里蓋十川者合湖漢水之經流而為十也湖漢水源流最長次之則涪水今校之水經鄱水下多繚水則除湖漢水得十川一清按此是漢代之九江而非禹貢之九江禹貢之九江自當以洞庭為據猶之三江班固地理志所云乃漢時現行之水道而于禹貢亦無與也

北入于江

大江南贛水總納洪流東西四十里而清潭遠漲綠波凝淨而會注于江川

廬江水出三天子都北過彭澤縣西北入于江

山海經三天子都一曰天子鄩王彪之廬山賦敘曰

廬山彭澤之山也雖非五嶽之數穹窿嵯峨實峻極
之名山也孫放廬山賦曰尋陽郡南有廬山九江之
鎮也臨彭蠡之澤接平敞之原開山圖曰山四方周
四百餘里疊鄣之巖萬仞懷靈抱異苞諸僊迹豫章
舊志曰廬俗字君孝本姓匡父東野王共鄱陽令吳
芮佐漢定天下而亡漢封俗于鄡陽曰越廬江俗兄
弟七人皆好道術遂寓精爽于宮庭之山故世謂之
廬山漢武帝南巡觀山以為神靈封俗大明公遠法

師廬山記曰殷周之際匡俗先生受道仙人共遊此

山一清按慧遠廬山記曰匡俗先生受道于仙人則受道仙人本非道號注云共遊此山又實有其人

矣所未喻也時人謂其所止為神僊之廬因以名山矣又

按周景氏曰廬山匡俗字子孝本東里子出周武王時生而神靈屢逃徵聘廬于此山時人敬事之俗後仙化空廬猶存弟子覲室悲哀哭之旦暮事同烏號世稱廬君故山取號焉斯耳傳之談非實證也故豫章記以廬為姓因廬以氏周氏遠師或記廬墓為辭

假憑虛以託稱二證既違三情互爽按山海經創志
大禹記錄遠矣故海內東經曰廬江出三天子都入
江彭澤西是曰廬江之名山水相依互舉殊稱明不
因匡俗始正是好事君子強引此類用成章句耳又
按張華博物志曹著傳其神自云姓徐受封廬山後
吳猛經過山神迎猛猛語曰君王此山近六百年符
命已盡不宜久居非據猛又贈詩云仰矚列仙館俯
察王神宅曠載暢幽懷傾蓋付三益此乃神道之事

亦有換轉理難詳矣吳猛隱山得道者也尋陽記曰
廬山上有三石梁長數十丈廣不盈尺杳然無底吳
猛將弟子登山過此梁見一翁坐柱樹下以玉杯承
甘露漿與猛又至一處見數人為猛設玉膏猛弟子
竊一寶欲以來示世人梁即化如指猛使送寶還手
牽弟子令閉眼相引而過其山川明淨風澤清曠氣
爽節和土沃民逸嘉遯之士繼響窟巖龍潛鳳采之
賢往者忘歸矣秦始皇漢武帝及太史公司馬遷咸

升其巖望九江而眺鍾彭焉

一清按鍾彭謂石鍾山及彭蠡澤也今注無石

鍾山之夫而唐時李渤作記尚引水經并鄱注其為
缺失無疑也寰宇記云南康軍都昌縣本漢彭蠡縣
也石鍾山在縣北二百一十里西枕彭蠡連峯疊嶂
壁立峭峻西南北面皆水四時如一白波撼山其聲
若鍾因名之按辨石鍾山記云水經云彭蠡之口有
石鍾山鄱道元以為下臨深潭微風鼓浪水石相搏
響若洪鍾因受其稱予幽棲者因尋繹東湖沿瀾窮
此遂躋崖穿洞訪其遺蹤次于南隅忽遇雙石歌枕
潭際影淪波中詢諸水濱乃曰石鍾也有銅鐵之異
焉扣而聆之南音函胡北音清越枹止響騰餘韻徐
歇若非澤滋其山山舍其英煦氣凝質發為至靈不
然則安能產茲奇石乎乃知山仍石名舊矣如善長
之論則瀕流庶峯皆可以斯名貫之卿刊前繆留遺
將來貞元戊寅歲七月八日白鹿先生記白鹿先生

姓李名渤字濬之時隱廬山因所居洞為號後任江
州刺史諫議大夫給事中桂管觀察使太和元年八
月七日故吏湖口鎮將吳大幹刻石鍾山記曰水經云彭
濬之之說而廣善長之意作石鍾山記曰水經云彭
蠡之口有石鍾山焉鄴道元以為下臨深潭微風鼓
浪水石相搏聲如洪鍾是說也人常疑之今以鍾磬
置水中雖大風浪不能鳴也而況石乎至唐李渤始
訪其遺蹤得雙石于潭上扣而聆之南聲函胡北聲
清越枹止響騰餘韻徐歇自以為得之矣然是說也
余尤疑之石之鏗然有聲者所在皆是也而此獨以
鍾名何哉元豐七年六月丁丑余自齊安舟行適臨
汝而長于邁將赴饒之德興尉送之湖口因得觀所
謂石鍾者寺僧使小童持斧于亂石間擇其一二扣
之慳慳焉余固笑而不信也至莫夜月明獨與邁乘
小舟至絕壁下大石側立千仞如猛獸奇鬼森然欲
搏人而山上棲鵲聞人聲亦驚起磔磔雲霄間又有

若老人欬且笑于山谷者或曰此鶴鶴也余方心動欲還而大聲發于水上噌吰如鍾鼓不絕舟人大恐徐而察之則山下皆石穴罅不知其深淺微波入焉涵澹澎湃而為此也舟迴至兩山間將入港口有大石當中流可坐百人空中而多竅與風水相吞吐有窾坎鏗鏘之聲與向之噌吰者相應如樂作焉因笑謂邁曰汝識之乎噌吰者周景王之無射也窾坎鏘者魏獻子之歌鍾也古之人不余欺也事不目見耳聞而臆斷其有無可乎酈元之所見殆與余同而言之不詳士大夫終不肯以小舟夜泊絕壁之下故莫能知而漁工水師雖知而不能言此世所以不傳也而陋者乃以斧斤考擊而求之自以為得其寶余是以記之蓋歎酈元之簡而笑李渤之陋也劉氏獻廷廣陽雜記曰酈道元所謂石鍾山東坡泊舟于此作記者乃上石鍾也蓋石鍾山有二曰上石鍾下石鍾意善長每遇山水之靈奇可喜者刻畫若圖畫使

人恍置身其間乃石鍾之佳趣僅傳數語
不得坡公之記世人固無有能言之者矣
廬山之北

有石門水水出嶺端有雙石高竦其狀若門因有石
門之目焉水導雙石之中懸流飛澍近三百許步下
散漫千步步上望之連天若曳飛練於霄中矣下有
磐石可坐數十人冠軍將軍劉敬宣每登陟焉其水
歷澗逕龍泉精舍南太元中沙門釋慧遠所建也其
水下入江南嶺即彭蠡澤西天子鄣也峯磴險峻人
跡罕及嶺南有大道順山而下有若畫焉傳云匡先

生所通至江道巖上有宮殿故基者三以次而上最

上者極于山峯山下又有神廟號曰宮亭廟故彭湖

亦有宮亭之稱焉余按爾雅云大山曰宮

何氏焯曰爾雅以大

山宮小山為句道元蓋誤一清按爾雅大山宮小山

霍疏云宮猶圍繞也謂小山在中大山在外圍繞之

山形若此者名霍非謂大山名宮小山名霍也然卷

末禹貢山水澤地所在霍山為南嶽注引爾雅大山

曰宮小山曰霍則彼文仍是莫謂善長真誤讀經也

宮之為名蓋起於此不必

水經注釋

三

流為兩昔吳郡太守張公直自守徵還

一清按搜神記云張璞字

公直不知何許人也為吳郡太守

道由廬山子女觀祠婢指女戲妃

像人其妻夜夢致聘怖而遽發明引中流而船不行

合船驚懼曰愛一女而合門受禍也公直不忍遂令

妾下女于江其妻布席水上以其亡兄女代之而船

得進公直方知兄女怒妻曰吾何面目于當世也復

下已女於水中將渡遙見二女子岸側傍有一吏立

曰吾廬君主簿敬君之義悉還二女故干寶書之於

感應焉山東有石鏡照水之所出有一圓石懸崖明
淨照見人影晨光初散則延曜入石豪細必察故名
石鏡焉又有二泉常懸注若白雲帶山廬山記曰白
水在黃龍南即瀑布也水出山腹挂流三四百丈飛
湍林表望若懸素注處悉成巨井其深不測其水下
入江淵廬山之南有上霄石高壁緬然與霄漢連接
秦始皇三十六年嘆斯嶽遠遂記為上霄焉上霄之
南大禹刻石誌其丈尺里數今猶得刻石之號焉湖

中有落星石周迴百餘步高五丈上生竹木傳曰有
星墜此因以名焉又有孤石介立大湖中周迴一里
竦立百丈矗然高峻特為環異上生林木而飛禽罕
集言其上有玉膏可采所未詳也耆舊云昔禹治洪
水至此刻石紀功或言秦始皇所勒然歲月已久莫
能辨之也

水經注釋卷三十九

欽定四庫全書

水經注釋卷四十

仁和趙一清撰

漸江水 斤江水 日南水 補弱水

補黑水 禹貢山水澤地所在

漸江水

一清按宋祁曰武陵有漸水東入沅疑此無漸水當作浙不知浙江並見說文武陵有漸

水固也而未可以漸江水當之

出三天子都

全氏曰顧祖禹曰大鄣山在績溪縣東六十里高五

百五十仞周一百五十里一名三王山祥符圖經云即三天子鄣山海經浙江出三天子都水經因之蓋訛鄣

為都秦置鄣郡以此山名也郭璞曰三天子鄣山在新
安歙縣東謂之玉山浙水出其傍寰宇記曰大鄣山吳
吳越于此分界葉夢得避暑錄話曰水經謂浙江出三
天子都取山海經為証三天子都在彭澤西安得至此
今錢塘江乃北江下流雖自彭澤來蓋眾江所會不應
獨取此一水予意漸字即浙字水經誤分為二名注引
漢志浙江者是已今自分水縣出桐廬號歙港者與衢
婺之溪合而過富陽以入大江大江自西來此江自東
來皆會于錢唐按山海經三天子鄣有三一曰在閩西
海北即浙江之源也郭景純云今在新安歙縣東謂之
三王山浙江出其傍者也一曰在衡山即廬江之源也
漢人以震山為衡山所謂在彭澤者也一曰在海中則
不知其處說者曰匡廬是西鄣徽是東北大鄣婺之永
陽亦有三天子鄣是南鄣其說當存而不論若林林謂
但在彭澤則謬矣又謂錢唐乃北江下流來自彭澤是
仍水經泗水篇以立文者然三天子鄣雖有三而大鄣

則非浙江之源秦漢間人以是取
郡名為鄞郡是非彭澤所能爭也

山海經謂之浙江也

一清按史記索隱曰韋昭云浙
江在今錢唐浙音折晉灼音逝

非也蓋其流曲折莊子所謂
制河即其水也制折聲相近
地理志云水出丹陽黟

縣南蠻夷中

一清按顧師古注漢書引地理志作漸
與道元所見之本作浙江者異見高忠

高后大功臣衣全祖望曰按王應麟云唐盧潘引地
理志作浙江出黟縣南率山東今觀是注所引則唐
本為誤也而新安人作志來以為山經之大因有率
山率水之目不知山經亦無此說山海經曰浙江出
三天子都在其東郭景純曰出新安黟縣南蠻中此
與漢志水經合當東漢時新安一帶山越居之故班
志謂之蠻夷今誤以蠻為率則誣甚矣率山率水不
見他書太平御覽云率即歛耳亦混語也其名寰宇

記姓收其目而九域志仍不及焉以羅北逕其縣南
存齋程璫墩職志事尚不能辨正何也

有博山山上有石特起十丈上峰若劍杪時有靈鼓

潛發正長臨縣以山鼓為候一鳴官長一年若長雷

發聲則官長不反浙江又北歷黟縣山縣居山之陽

故縣氏之漢成帝鴻嘉二年以為廣德國封中山憲

王孫雲客王於此晉太康中以為廣德縣分隸宣城

郡會稽陳業潔身清行邀跡此山浙江又北逕歙縣

東與一小谿合水出縣東北翁山西逕故城南又西

南入浙江又東逕遂安縣南谿廣二百二上立杭以
相通水甚清深潭不掩鱗故名新定分歙縣立之晉
太康中又改從今名浙江又左合絕谿谿水出始新
縣西東逕縣故城南為東西長谿谿有四十七瀨濬
流驚急奔波聒天孫權使賀齊討黥歙山賊賊固黥
之林歷山山甚峻絕又上禁五兵齊以鐵杙椽山升
出不意人以白梧擊之氣禁不行遂用奇功平賊於
是立始新之府於歙之華鄉令齊守之後移出新亭

晉太康元年改曰新安郡谿水東注浙江浙江又東北逕建德縣南縣北有烏山山下有廟廟在縣東七里廟渚有大石高十丈圍五尺水瀨濬急而能致雲雨浙江又東逕壽昌縣南自建德至此八十里中有十二瀨瀨皆峻嶮行旅所難縣南有孝子夏先墓先少喪二親負土成墓數年不勝哀卒浙江又北逕新城縣桐谿水注之水出吳興郡於潛縣北天目山山極高峻崖嶺竦疊西臨浚澗山上有霜木皆是數百

年樹謂之翔鳳林東面有瀑布下注數畝深沼名曰
浣龍池池水南流逕縣西谿谿水又東南與紫谿合
水出縣西百丈山即潛山也山水東南流名為紫谿
中道夾水有紫色磐石石長百餘丈望之如朝霞又
名此水為赤瀨蓋以倒影在水故也紫谿又東南流
逕白石山之陰

一清按吳越春秋曰南踰赤岸徐天祐注曰水經曰新安縣南白石山名

廣陽山水曰赤岸水今本無之

山甚峻極北臨紫谿又東南連山夾

水兩峯交峙反項對石往往相捍十餘里中積石磊

砢相挾而上澗下白沙細石狀若霜雪水木相映泉石爭暉名曰樓林紫谿又東南流逕桐廬縣東為桐谿孫權藉谿之名以為縣目割富春之地立桐廬縣自縣至於潛凡十有六瀨第二是嚴陵瀨瀨帶山山下有石室漢光武帝時嚴子陵之所居也故山及瀨皆即人姓名之山下有磐石周迴十數丈交枕潭際蓋陵所游也桐谿又東北逕新城縣入浙江縣故富春地孫權置後省并桐廬咸和九年復立為縣浙江

又東北入富陽縣故富春也晉后名春改曰富陽也

東分為湖浦浙江又東北逕富春縣南縣故王莽之

誅歲也江南有山孫武皇之先所葬也漢末墓上有

光如雲氣屬天黃武四年孫權以富春為東安郡分

置諸郡以討山越命全琮

一清按三國志吳書孫權傳事在黃武五年秋七月

浙江又東北逕亭山西山上有孫權父冢

一清按吳書孫策傳

云堅薨還葬曲阿孫權傳云吳高陵松栢斯拔高陵堅冢名吳地記云堅墓在盤門內何焯曰參以謝詢

請置守冢之文則大臺定葬吳也許彥周詩話云楊舜韶名友雙在姑蘇時盜發孫堅冢楊作詩云云今

注所云得無因孫鍾墓而誤耶鍾因種瓜得墓地事
備幽明錄又按劉昭郡國志補注吳本國下引皇覽
曰縣東門外孫武冢蓋春秋時人後人或指此訛為
堅墓則陳壽志還墓曲阿之說未可非也道元指富
春所墓為孫權父墓尤誤當是孫堅父鍾孫亮立廟
稱曰太祖者而幽明錄沈約宋書謂以鍾為堅之祖
恐不如劉敬叔異苑以
鍾是堅父之確當也

北過餘杭東入于海

浙江逕縣左合餘杭大谿江北即臨安縣界水北對
郭文宅宅傍山面谿宅東有郭文墓晉建武元年驃
騎王導迎文置之西園文逃此而終臨安令改葬之

建安十六年縣民郎稚作亂賀齊討之孫權分餘杭
立臨水縣晉改曰臨安縣因岡為城南門尤高謝安
涖郡遊縣逕此門以為難為亭長浙江又東逕餘杭
故縣南新縣北秦始皇南遊會稽途出是地因立為
縣王莽之淮睦也漢末陳渾移築南城縣後谿南大
塘即渾立以防水也縣南有三碑是顧颺范甯等碑
縣南有大壁山郭文自陸渾遷居也浙江又東逕烏
傷縣北王莽改曰烏孝郡國志謂之烏傷異苑曰東

陽顏烏以淳考著聞後有羣烏銜土集顏烏所居之
邨烏口皆傷一境以為顏烏至孝故致慈烏欲令孝
聞聲速聞又名其縣曰烏傷矣浙江又東北流至錢

塘縣穀水入焉水源西出太末縣縣是越之西部姑

蔑之地也

全氏曰漢時方有分部而西部亦不在姑蔑東分郡西部始在姑蔑耳春秋戰國

時不當以西部目之秦以為縣王莽之末治也一清按黃

本作未理猶仍唐人寫本之舊吳寶鼎中分會稽立隸東陽郡穀水

東逕獨松故冢下冢為水毀其塼文筆言吉龜言凶

百年墮水中今則同龜繇矣穀水又東逕長山縣南
與永康谿水合縣即東陽郡治也縣漢獻帝分烏傷
立郡吳寶鼎中分會稽置城居山之陽或謂之長仙
縣也言赤松采藥此山因而居之故以為名後傳呼
乖謬字亦因改谿水南出永康縣縣赤烏中分烏傷
上浦立劉敬叔異苑曰孫權時永康縣有人入山遇
一大龜即束之以歸龜便言曰游不量時為君所得
擔者怪之載出欲上吳王夜宿越里纜船于大桑樹

宵中樹忽呼龜曰元緒奚事爾也龜曰行不擇日今
方見烹雖盡南山之樵不能潰我樹曰諸葛元遜識
性淵長必致相困令求如我之徒計將安泊龜曰子
明無多辭既至建業權將煮之燒柴萬車龜猶如故
諸葛恪曰然以老桑乃熟獻人仍說龜言權使伐桑
取煮之即爛故野人呼龜曰元緒其水飛湍北注至
縣南門入穀水穀水又東定陽谿水注之水上承信
安縣之蘇姥布縣本新安縣晉武帝太康三年改曰

信安水懸百餘丈瀨勢飛注狀如瀑布瀨邊有石如
牀牀上有石牒長三尺許有似雜采帖也東陽記云
信安縣有縣室坂晉中朝時有民王質伐木至石室
中見童子四人彈琴而歌質因留倚柯聽之童子以
一物如棗核與質質含之便不復饑俄頃童子曰其
歸承聲而去斧柯漙然爛盡既歸質去家已數十年
親情彫落無復向時比矣其水分納衆流混波東逝
逕定陽縣夾岸緣谿悉生支竹及芳枳木連雜以霜

菊金橙白沙細石狀如凝雪石溜湍波浮響無輟山
水之趣尤深人情縣漢獻帝分信安立谿亦取名焉
谿水又東逕長山縣北北對高山山下水際是赤松

羽化之處也炎帝少女追之亦俱仙矣後人立廟于

山下

一清按太平御覽引水經注曰赤松澗在東陽赤松子游金華山以火自燒而化故山上有赤

松子之祠澗自山出故曰赤松澗今本無之

谿水又東入于穀水穀水又

東逕烏傷縣之雲黃山山下臨谿水水際石壁傑立
高一百許丈又與吳寧谿水合水出吳寧縣下逕烏

傷縣入穀謂之烏傷谿水閘中有徐登者女子化為
丈夫與東陽趙昞並善越方時遭兵亂相遇于谿各
示所能登先禁谿水為不流昞次禁枯柳柳為生莖
二人相視而笑登年長昞師事之後登身故昞東入
章安百姓未知昞乃升茅屋梧鼎而爨主人驚怪昞
笑而不應屋亦不損又嘗臨水求渡船人不許昞乃
張蓋坐中長嘯呼風亂流而濟於是百姓神服從者
如歸章安令惡而殺之民立祠於永寧而蚊蚋不能

入晒秉道懷術而不能全身遠害事同萇宏宋元之
龜厄運之來故難救矣穀水又東入錢唐縣而左入
浙江故地理志曰穀水自太末東北至錢唐入浙江
是也浙江又東逕靈隱山山在四山之中有高崖洞
穴左右有石室三所又有孤石壁立大三十圍其上
開散狀似蓮花昔有道士長往不歸或因以稽留為
山號山下有錢唐故縣浙江逕其南王莽更名之曰
泉亭地理志曰會稽西部都尉治錢唐記曰防海大

塘在縣東一里許郡議曹華信家議立此塘以防海

水始開幕有能致一斛土者即與錢一千旬月之間

來者雲集塘未成而不復取於是載土石者皆棄而

去塘以之成故改名錢塘焉

一清按武林水因武林山泉潴而為湖舊湖水

通江後人築塘以隔江湖泉與錢通用王莽改錢唐為泉亭閼駟曰山出錢水可証也故湖曰錢湖江曰

錢江皆以一塘分限得名華信築塘與錢之事蓋出于傳記之悠謬耳

縣南江側有明

聖湖父老傳言湖有金牛古見之神化不測湖取名

焉縣有武林山武林水所出也閼駟云山出錢水東

入海

全氏曰漢志會稽郡錢唐縣武林山武林水所出東入海行八百三十里武林山即靈隱山在

今錢唐縣治西五里武林水東入海則是截錢唐江而東趣龍精以達于海不然不得云東入也計其里

數不及二百何云八百三十里耶一清按說文有漸江又有浙江云江水東至山陰為浙江則點縣之漸

江至錢唐乃有浙名班志有浙江無浙江浙江下但云東入海不計道里之數至錢唐武林水亦云東入

海行八百三十里補此一句以見浙江之即漸江也武林水既入于江則是合江流而東入于海推本源

流所行恰有此數吳地記言縣唯浙江今無此水清一

亦非孟堅誤記也按武林水即錢水今杭人所謂西湖縣東有定包諸者是陸氏之記殆不識眉目之言也

山皆西臨浙江水流於兩山之間江川急濬蕪濤水

晝夜再來來應時刻常以月晦及望尤大至二月八月最高峨峨二丈有餘吳越春秋以為子胥文種之神也昔子胥亮於吳而浮尸於江吳人憐之立祠於江上名曰胥山吳錄曰胥山在太湖邊去江不百里故曰江上文種誠於越而伏劍於山陰越人哀之葬於種山文種既葬一年子胥從海上負種俱去游夫江海故潮水之前揚波者伍子胥後重水者大夫種是以枚乘曰濤無記焉秦始皇三十七年將遊會稽

至錢唐臨浙江所不能渡故道餘杭之西津也浙江
北合詔息湖湖本名胙湖因秦始皇帝巡狩所憩故
有詔息之名也浙江又東合臨平湖吳苑曰晉武時
吳郡臨平岸崩出一石鼓打之無聲以問張華華曰
可取蜀中桐材刻作魚形扣之則鳴矣於是如言聲
聞數十里劉道民詩曰事有遠而合蜀桐鳴吳石傳
言此湖草薺壅塞天下亂是湖開天下平孫皓天璽
元年吳郡上言臨平湖自漢末薺塞今更開通又於

湖邊得石函函中有小石青白色長四寸廣二寸餘
刻作皇帝字於是改天冊為天璽元年孫盛以為元
皇中興之符徵五湖之石瑞也錢塘記曰桓元之難

湖水色赤熒熒如丹湖水上通浦陽江下注浙江

全氏

曰臨平湖在浙江之西不得越浙江而通浦陽江若
云上通南江則善矣一清按此文不誤與河水篇注
正同即此一句乃知名曰東江行旅所從以出浙江

南江與浙江合之證

也浙江又東逕禦兒鄉萬善厯曰吳黃武六年正月
獲彭綺是歲由拳西鄉有產兒墮地便能語云天方

明河欲清鼎脚折金乃生因是詔為語兒鄉非也禦
兒之名遠矣蓋無智之徒因籍地名生情穿鑿耳國
語曰勾踐之地北至禦兒是也安得引黃武證地哉
韋昭曰越北鄙在嘉興浙江又東逕柴辟南舊吳楚
之戰地矣備候于此故謂之辟塞是以越絕稱吳故
從由拳辟塞渡會夷湊山陰是也浙江又逕固陵城
北昔范蠡築城于浙江之濱言可以固守謂之固陵
今之西陵也浙江又東逕柵塘謂之柵瀆昔太守王

朗拒孫策數戰不利孫靜果說策曰朗負阻城守難
可卒拔祖瀆去此數十里是要道也若從此出攻其
無備破之必矣策從之破朗于固陵有西陵湖亦謂

之西城湖湖西有湖城山東有夏架山

毛奇齡蕭山縣志刊誤曰

當作東有湖城山西有夏架山夏架山去海祇數里焉得復有湖在西

湖水上承妖皋

谿而下注浙江又逕會稽山陰縣有苦竹里里有舊
城言勾踐封范蠡子之邑也浙江又東與蘭谿合湖
南有天柱山湖口有亭號曰蘭亭亦曰蘭上里太守

王羲之謝安兄弟數往造焉吳郡太守謝朏封蘭亭侯蓋取此亭以為封號也太守王廩之移亭在水中晉司空何無忌之臨郡也起亭於山椒極高盡眺矣亭宇雖壞基陞尚存浙江又逕越王允常冢北冢在木客村者彥云勾踐使工人伐檜楯欲以獻吳久不得歸工人憂思作木客吟後人因以名地勾踐都琅邳欲移允常冢家中生分風飛沙射人人不得近勾踐謂不欲遂止浙江又東北得長湖口湖廣五里東

西百三十里沿湖開水門六十九所下溉田萬頃北
瀉長江湖南有覆斗山周五百里北連鼓吹山山西
枕長谿谿水下注長湖山之西嶺有賀臺越入吳還
而成之故號曰賀臺矣又有秦望山在州城正南為
衆峯之傑陟境便見史記云秦始皇登之以望南海
自平地以取山頂七里懸磴孤危徑路險絕記云扳
蘿捫葛然後能升山無甚高木當由地迴多風所致
山南有嵯峴峴裏有大城越王無餘之舊都也故吳

越春秋云勾踐語范蠡曰先君無餘國在南山之陽
社稷宗廟在湖之南又有會稽之山古防山也亦謂
之為茅山又曰棟山越絕云棟猶鎮也蓋周禮所謂
揚州之鎮矣山形四方上多金玉下多跌石山海經
曰勺水出焉南流注于淇吳越春秋稱覆釜山之中
有金簡玉宇之書黃帝之遺識也山下有禹廟廟有
聖姑像禮樂緯云禹治水畢天賜神女聖姑即其像
也山上有禹冢昔大禹即位十年東巡狩崩于會稽

因而葬之有鳥來為之耘春拔草根秋啄其穢是以
縣官禁民不得妄害此鳥犯則刑無赦山東有湮井
去廟七里深不見底謂之禹井云東游者多探其穴
也秦始皇發稽山刻石紀功尚存山側孫暢之述書
云丞相李斯所篆也又有石匱山石形似匱上有金
簡玉宇之書言夏禹發之得百川之理也又有射的
山遠望山的狀若射侯故謂射的射的之西有石室
名之為射堂年登否常占射的以為貴賤之準的明

則米賤的閭則米貴故諺云射的白斛米百射的元
斛米千北則石帆山山東北有孤石高二十餘丈廣
八丈望之如帆因以為名北臨大湖水深不測傳與
海通何次道作郡常於此水中得烏賊魚南對精廬
上蔭修木下瞰寒泉西連稽山皆一山也東帶若邪

溪吳越春秋所謂歐冶涸以成五劍

一清按越絕外傳記寶劍曰當

此造劍之時赤堇之山破而出錫若邪之溪涸而出
銅赤堇山在今寧波府奉化縣東五十里漢取山名
以氏縣曰鄞縣漢志會稽郡鄞縣下云有鎮亭有鮒
埼亭東南有天門水入海有越天門山鎮亭山名在

奉化縣西南百里勢極高天門山在縣南六十里一名蜚樓門濱裏港海兩峯對峙勢若挿天天門水即縣之廣平湖及大溪是也而水經注無開焉又按天門水在海口有龍居之明都督萬丈巡海夜射眇其目今猶謂之

錄門老龍也

谿水上承嵯岷麻谿谿之下孤潭周數

畝甚清深有孤石臨潭垂崖俯視猿狖驚心寒木被潭森沈駭觀上有一櫟樹謝靈運與從弟惠連常遊之作連句題刻樹側麻谿下注若邪谿水至清照衆山倒影窺之如畫漢世劉寵作郡有政績將解任去治此谿父老人持百錢出送寵各受一文然山栖遯

逸之士谷隱不羈之民有道則見物以感遠為貴荷
泉致意故受者以一錢為榮豈藉費也義重故耳谿
水下注大湖邪溪之東又有寒谿谿之北有鄭公泉
泉方數丈冬溫夏涼漢太尉鄭宏宿居潭側因以名
泉宏少以苦節自居恒躬采伐用貿糧膳每出入谿
津常感神風送之雖憑舟自運無杖楫之勞邨人貪
藉風勢常依隨往還者徒輩相謂汝不欲及
鄭風耶其感致如此湖水自東亦注江通海水側有

白鹿山山北湖塘上舊有亭黃門郎楊哀明居於宏
訓里太守張景數往造焉使開瀆作埭埭之西作亭
亭埭皆以楊為名孫恩作賊從海來楊亭被燒後復
修立厥名猶在東有銅牛山山有銅穴三十許丈穴
中有大樹神廟山上有冶官山北湖下有鍊塘里吳
越春秋云勾踐鍊冶銅錫之處采炭於南山故其間
有炭瀆勾踐臣吳吳王封勾踐于越百里之地東至
炭瀆是也縣南九里有侯山山孤立長湖中晉車騎

將軍孔敬康少時遜世栖跡此山

全氏曰孔愉棄官居山陰不得言是

少時湖北有三小山謂之鹿野山在縣南六里按吳越

春秋越之麋苑也山有石室言越王所遊息處矣縣

南湖北有陳音山楚之善射者曰陳音越王問以射

道又善其說乃使簡士習射北郊之外按吳越春秋

音死葬于國西山上今陳音山乃在國南五里湖北

有射堂及諸邸舍連行相屬又于湖中築塘直指南

山北即大越之國秦改為山陰縣會稽郡治也太史

公曰禹會諸侯計於此命曰會稽者會計也始以山

名因為地號夏后少康封少子杼以奉禹祠為越氏全

曰按夏人報杼乃夏后之賢者豈以支子分封奉祠哉史記越世家亦不云是后杼也世歷殷

周至于允常列於春秋允常卒勾踐稱王都于會稽

吳越春秋所謂越王都埤中在諸暨北界山陰康樂

里有地名邑中者是越事吳故北其門以東為右西

為左故雙闕在北門外闕北百步有雷門門樓兩層

勾踐所造時有越之舊木矣州郡館宇屋之大瓦亦

多是越時故物

全氏曰按此即王十朋賦所云雙杉廳是越故物者也

勾踐霸

世徙都瑯琊後為楚伐始還浙東城東郭外有靈汜
下水甚深舊傳下有地道通于震澤又有勾踐所立
宗廟在城東明里中甘滂南又有玉笥竹林雲門天
柱精舍並疏山創基架林裁宇割澗延流盡泉石之
好水流逕通浙江又北逕山陰縣西西門外百餘步
有怪山本瑯琊郡之東武縣山也飛來徙此壓殺數
百家吳越春秋稱怪山者東武海中山也一名自來

山百姓怪之號曰怪山亦云越王無疆為楚所伐去
瑯琊山東武人隨居山下遠望此山其形似龜故亦
有龜山之稱也越起靈臺于山上又作三層樓以望
雲物川土明秀亦為勝地故王逸少云從山陰道上
猶如鏡中行也浙江之上又有大吳王小吳王邨並
是闔閭夫差伐越所舍處也今悉民居然猶存故目
昔越王為吳所敗以五千餘衆栖于稽山卑身待士
施必及下呂氏春秋曰越王之栖于會稽也有酒投

江民飲其流而戰氣自倍所投即浙江也許慎晉灼
並言江水至山陰為浙江江之西岸有朱室塢勾踐
百里之封西至朱室謂此也浙江又東北逕種山西
大夫丈種之所葬也山上有白樓亭亭本在山下縣
令殷朗移置今處沛國桓儼避地會稽聞陳業履行
高潔往候不見儼後浮海南入交州臨去移書與業
不因行李繫白樓亭柱而去升陟遠望山湖滿目也
永建中陽羨周嘉上書以縣遠赴會至難求得分置

遂以浙江西為吳以東為會稽漢高帝十二年亦吳

也

全氏曰按高帝六年會稽郡屬荆王賈國中十二年屬吳王濞國中故曰亦吳也景帝四年始以郡

屬天

後分為三世號三吳吳郡吳興郡會稽其一焉

又逕永興縣南縣在會稽東北一百二十里也闔閭

弟夫槩之故邑也

一清按此是應劭說而顏師古非之然吳伐越封勾踐以百里之地

則或取其餘地以王莽之餘衍也漢末童謠云天子

封夫槩未可知也

當興東南三餘之間

一清按永興故漢之餘暨與餘姚餘杭而為三故曰三餘也

故孫權改曰永興縣濱浙江又東合浦陽江江水導

源烏傷縣又東逕諸暨縣與洩谿合谿廣數丈中道
有兩高山夾谿造雲壁立凡有五洩下洩懸三十餘
丈廣十丈中三洩不可得至登他山遠望乃得見之
懸百餘丈水勢高急聲震水外上洩懸二百餘丈望
若雲垂此是瀑布土人號為洩也江水又東逕諸暨
縣南縣臨對江流江南有射堂縣北對烏山故越地
也夫槩王之故邑一清按漢志之餘暨吳更名永興
應劭云夫槩之所邑即今之蕭山
縣也又諸暨莽曰疏虜不云是夫槩邑注上文于永
興縣下已引應說此文複出豈誤諸暨為餘暨乎

先名上諸暨亦曰勾無矣故國語曰勾踐之地南至
勾無王莽之疎虜也夾水多浦浦中有大湖春夏多
水秋冬涸淺江水又東南逕剡縣與白石山水會山
上有瀑布懸水三十丈下注浦陽江浦陽江水又東
流南屈又東迴北轉逕剡縣東王莽之盡忠也縣開
東門向江江廣二百餘步自昔者舊傳縣不得開南
門開南門則有賊盜江水翼縣轉注故有東渡西渡
焉東南二渡通臨海並泛單船為浮航西渡通東陽

併二十五船為橋航江邊有查浦浦東行二百餘里與勾章接界浦裏有六里有五百家並夾浦居列門向水甚有良田有青谿餘洪谿大發谿小發谿江上

有六谿六谿裂溉入江

一清按漢志會稽郡勾章縣渠水東入海全氏曰即六谿

之水也凡言渠水必皆以人力為之勾章之渠水亦是居民苦江湖之斥鹵而引山谿之水為渠以利田溉是即謂之渠水者矣蓋六谿皆單谿之支流單谿入浦陽而此六谿者猶而為渠遂獨擅勾章之望雖于前記無明文然舍此夾谿上下崩崖若傾東有單六谿更無水以當之矣

山南有黃山與白石三山為縣之秀峯山下衆流泉

導湍石激波浮嶮四注浦陽江又東逕石橋廣八丈
高四丈下有石井口徑七尺橋上有方石長七尺廣
一丈二尺橋頭有磐石可容二十人坐谿水兩傍悉
高山山有石壁二十許丈谿中相攻鼎響外發未至
橋數里便聞其聲江水北逕嵎山山下有亭亭帶山
臨江松嶺森蔚沙渚平淨浦陽江又東北逕始寧縣
嶧山之成功嶠嶠壁立臨江歇路峻狹不得併行行
者牽木稍進不敢俯視嶠西有山孤峯特上飛禽罕

至嘗有采藥者沿山見通谿尋上于山頂樹下有十
二方石地甚光潔還復更尋遂迷前路言都仙之所
憩讌故以壇讌名山嶠北有嶧浦浦口有廟廟甚靈
驗行人及樵伐者皆先敬焉若相侵竊必為蛇虎所
傷此則嶧山與嵎山接二山雖曰異縣而峯嶺相連
其間傾澗懷煙泉谿引霧吹畦風馨觸岫延賞是以
王元琳謂之神明境事備謝康樂山居記浦陽江自
嶧山東北逕太康湖車騎將軍謝元田居所在右濱

長江左傍連山平林脩通澄湖遠鏡于江曲起樓樓
側悉是桐梓森聳可愛居民號為桐亭樓樓兩面臨
江盡升眺之趣蘆人漁子泛濫滿焉湖中築路東出
趣山路甚平直山中有三精舍高甍凌虛垂簷帶空
俯眺平林煙杳在下水陸寧晏足為避地之鄉矣江
有琵琶圻圻有古冢墮水甍有隱起字云筮吉龜凶
八百年落江中謝靈運取甍詣京咸傳觀焉乃如龜
繇故知冢已八百年矣浦陽江又東北逕始寧縣西

本上虞之南鄉也漢順帝永建四年陽羨周嘉上書
始分之舊治水西常有波潮之患晉中興之初治今
處縣下有小江源出岵山謂之岵浦逕縣下西流注
于浦陽徐山下注此浦浦西通山陰浦而達于江江
廣百丈狹處二百步高山帶江重陰被水江閱漁商
川交樵隱故桂棹蘭橈望景爭途江南有故城太尉
劉牢之討孫恩所築也

全氏曰按劉牢之終于鎮北
將軍其討孫恩時為會稽五

部都督
非太尉

江水東逕上虞縣南王莽之會稽也本司鹽

都尉治也地名虞賓晉太康地記曰舜避丹朱於此故以名縣百官從之故縣北有百官橋亦云禹與諸

侯會事訖因相虞樂故曰上虞二說不同未詳孰是

一清按釋名曰吳虞也封太伯于此以虞其志即虞樂之義古娛虞通用也縣南有蘭風

山山少木多石驛路帶山傍江路邊皆作欄干山有三嶺枕帶長江蒼蒼孤危望之若傾緣山之路下臨大川皆作飛閣欄干乘之而渡謂此三嶺為三石頭丹陽葛洪遯世居之基井存焉瑯琊王方平性好山

水又爰宅蘭風垂釣于此以永終朝行者過之不識
問曰賣魚師得魚賣否方平答曰釣亦不得復不
賣亦謂是水為上虞江縣之東郭外有漁浦湖中有
大獨小獨二山又有覆舟山覆舟山下有漁浦王廟
廟今移入裏山北三山孤立水中湖外有青山黃山
澤蘭山重岫疊嶺參差入雲澤蘭山頭有深潭山影
臨水水色青綠山中有諸塢有石槌一所右臨白馬
潭潭之深無底傳云創湖之始邊塘屢崩百姓以白

馬祭之因以名水湖之南即江津也江南有上塘陽
中二里隔在湖南常有水患太守孔靈符遣蜂山前
湖以為埭埭下開瀆直指南津又作水榭二所以舍
此江得無淹潰之害縣東有龍頭山崖之間有石井
冬夏常冽清泉南帶長江東連上陂江之道南有曹
娥碑娥父盱迎濤溺死娥時年十四哀父尸不得乃
號踴江介因解衣投水祝曰若值父尸衣當沈若不
值衣當浮裁落便沈娥遂于沈處赴水而死縣令度

尚使外甥邯鄲子禮為碑文以彰孝烈江濱有馬目
山洪濤一上波隱是山勢淪嵒亭間歷數縣行者難
之縣東北亦有孝子楊威母基威少失父事母至孝
常與母入山采薪為虎所逼自計不能禦於是抱母
且號且行虎見其形遂弭耳而去自非誠貫精微孰
能理感于英獸矣又有吳瀆破山導源注于胥江上
虞江東逕周市而注永興地理志曰縣有仇亭柯水
東入海仇亭在縣之東北一十里江北柯水疑即江

也又東北逕永興縣東與浙江合謂之浦陽江地理

志又云縣有蕭山潘水所出東入海

一清按劉昭郡國志補注引魏

都賦注作潛水劉良注作漢水皆潘字之誤

又疑是浦陽江之別名也自

外無水以應之

全氏曰浦陽江水發源義烏分于諸暨是為曹娥錢清二口其自義烏山

南出者道由萬壩所謂東小江也下流斯為曹娥其自山北出者道由義橋所謂西小江也下流斯為錢清考浦陽之名漢時所未有故班志不錄然志于浦陽東道之水則曰柯水而係之上虞即曹娥也西道之水則曰潘水而係之餘暨即錢清也續志有潘水而失柯水至韋昭始以浦陽為三江之一六朝時合曹娥錢清二江總曰浦陽故謝康樂山居賦所云皆指曹娥而南史爭戰之地則皆在錢清歷唐五代作

志乘者尚無曹娥錢清之名故九域志以曹娥鎮屬會稽錢清鎮屬山陰可証也道元注水經以上虞江稱曹娥而錢清則否是知曹娥為浦陽江經流無疑矣觀南史浦陽江南北各有埭司以稽察行旅胡梅碕曰浦陽江南津埭即今之梁湖堰北津埭即今之曹娥堰與西陵埭柳浦埭稱四埭六朝官制班班足與水道相證明蓋浦陽之水東行者當堤堰未興之日直自餘姚達于勾章之境非猶夫今之曹娥也道元言之不明遂啓後人之疑

浙江又東注于海故山海經曰浙江

在其東在閩西北入海韋昭以松江浙江浦陽江為

三江

斤江水出交趾龍編縣東北至鬱林領方縣東注于鬱

地理志云逕臨塵縣至領方縣注于鬱

容容夜緬湛乘牛渚須無無濡營進皇無地零侵黎

侵黎水出廣州晉興郡郡以太康中分鬱林置行至

臨塵入鬱

一清按漢志鬱林郡臨塵縣下云又有侵離水行七百里亦見溫水注云逕臨塵入

領方

注鬱

無會重瀨夫省無變

一清按無變見溫水注

由蒲王都融勇外此

皆出日南郡西東入于海

容容水在南垂名之以次轉北也右三十水從江已

南至日南郡也

一清按自容容以下丈義難曉今以雙字數之得十七水耳而注云三十

水豈有脫丈耶漢志日南郡下云有小水十六并行三十一百八十里屬交州稍為近之全氏曰漢志日

南郡西捲縣下云水入海則西捲亦水名西捲水見溫水注

補

弱水

禹貢錐指曰弱水經不言所出桑欽以為出張掖刪丹縣鄭康成曰衆水東流此獨西流而水經注無之其所經入不可得而詳也一清按史記索隱曰水經曰弱水出張掖刪丹縣西北至酒泉會水縣入合黎

山腹漢志張掖郡刪丹縣桑欽以為導弱水自此西
至酒泉合黎即是小司馬所引之文是唐時尚有弱
水篇今本盡失之耳張守節正義亦云合黎水出臨
松縣東而北流逕張掖故城下又北流至縣北二十
三里合弱水弱水自合黎山折而北流逕沙磧之西
入居延澤行千五百里又漢志金城郡臨羌縣下云
有弱水說文曰弱水自張掖刪丹西至酒泉合黎餘
波入于流沙觀此則弱水之源委約畧可得矣又曰

岷山也或曰弱水之所出十六國春秋乞伏札子擊吐谷渾覓地于弱水西元和志弱水在刪丹縣南山下括地志蘭門山一名窮石在刪丹縣西南七十里離騷夕次于窮石淮南子弱水出窮石山是也隋書地理志刪丹縣有祀山弱水胡渭曰疑即岷字之誤寰宇記曰合黎水一名羌谷鮮水一名覆袁水亦名張掖河南自吐谷渾界流入禹貢導弱水至于合黎孔安國云合黎水名在流沙東即謂此也詳河水篇

第二卷注中

補
黑水

禹貢錐指曰傳云黑水自北而南經三危過梁州入南海正義云地理志益州郡計在蜀郡西南三千餘里故滇王國也武帝元封二年始開為郡郡內有滇池縣縣有黑水池止言有池不知水之所在鄭云今中國無也傳之此言順經文耳按酈元水經黑水出張掖雞山南流至燉煌過三危山南流入于南海然

張掖燉煌並在河北所以黑水得越河入南海者自積石以西皆多伏流故黑水得越而南也今按滇池所祠之黑水即金沙江與雍州無涉山海經曰灌湘之山又東五百里曰雞山黑水出焉而南流注于海雞山不知在何郡郭璞無注而孔疏引水經以為出張掖之雞山檢今本無此文蓋其書有散逸耳太平御覽引張掖記曰黑水出縣界雞山亦名元圃昔有娥氏女簡狄浴于元止之水即黑水也據此則雞山

當在甘州張掖縣界漢為牂得縣地今陝西甘州衛
西有張掖河即古羌谷水出羌中北流至衛西為張
掖河合弱水東北入居延海俗謂之黑河此水並不
經三危入南海安得以此為禹貢之黑水耶山海經
明言南流注于海必非東北入居延之張掖河其雞
山恐亦不在縣界也又曰夏殷之衰雍州西北境皆
為戎翟所據及周室東遷舊都八百里之地悉棄以
予秦秦染夷俗諸侯擯之不與中國會盟輶軒之使

豈有過而問焉況三危西裔之區乎故屈原天問曰
黑水元趾三危安在蓋自戰國時此地之山川已與
崑崙弱水同其渺茫僅得之傳聞而無從目驗矣秦
火之後載籍淪亡漢興治尚書者不能言黑水三危
之所在武帝通西域玉門陽關之外使者往來數十
輩不聞涉大川而西可以當古之黑水者故班志張
掖酒泉燉煌郡下並無其文司馬彪亦無可言至酈
道元始云黑水出張掖難山而所謂南流至燉煌

過三危入南海亦不過順經為義與他水歷敘所過之郡縣者詳畧相去遠矣故杜佑云道元注水經銳意尋討亦不能知黑水所經之處唐初魏王泰括地志云黑水出伊吾縣北此與張掖雞山未知孰是然其所謂南流絕三危者竟亦不可復尋禹治黑水不若治河之詳自屈原已不能知而況伏生輩乎自古文尚書家已不能知而況班固司馬彪鄺道元魏王泰諸人乎至若樊綽程大昌金履祥李元陽等紛紛

辨論繁風捕影了無所得徒獻笑于後人而已

嵩高為中嶽在潁川陽城縣西北

春秋說題辭曰陰含陽故石凝為山國語曰禹封九山山土之聚也爾雅曰山大而高曰崧合而言之為崧高分而名之為二室西南為少室東北為太室嵩高山記曰山下巖中有一石室云有自然經書自然飲食又云山有玉女臺言漢武帝嘗見之因以名臺泰山為東嶽在泰山博縣西北

岱宗也王者封禪於其山示增高也有金策玉檢之事焉

霍山為南嶽在廬江灊縣西南

天柱山也爾雅云大山宮小山曰霍開山圖曰其山

上侵神氣下固窮泉

全氏曰按禹貢不志霍山蓋以五嶽而類及之一清按下又出

衡山則禹貢荊州之山為南嶽也此因漢武帝改祀而特記之

華山為西嶽在宏農華陰縣西南

古文之惇物山也

一清按漢志右扶風武功縣下云華山古文以為惇物非華山也道

元誤引朱謀埠曰
豈垂華字相亂耶

雷首山在河東蒲坂縣東南砥柱在河東大陽縣東河
中王屋山在河東垣縣東北也

昔黃帝受丹訣于是山也

太行山在河內野王縣西北

王烈得石髓處也

恒山為北嶽在中山上曲陽縣西北碣石山在遼西臨

渝縣南水中也

禹貢鉅指曰漢志右北平驪成縣下云
大碣山在縣西南莽曰碣石遼西郡案

縣下云有揭石水南入官不言有山也及文潁注武紀曰碣石在遼西紫縣紫縣今罷入臨渝此石著海旁潁字外良南陽人為荊州從事謂此山臨渝之派石與班固異自潁始水經有魏晉間人所附益故亦云碣石在臨渝後漢志無驪成劉昭補注遂于臨渝言碣石

大禹鑿其石夾右而納河秦始皇漢武帝皆嘗登之海水西侵歲月逾甚而苞其山故言水中矣

析城山在河東獲澤縣西南太嶽山在河東永安縣壺口山在河東北屈縣東南龍門山在河東皮氏縣西梁山在馮翊夏陽縣西北河上荆山在馮翊懷德縣南岐

山在扶風美陽縣西北汧山在扶風汧縣之西也

禹貢北條山也

一清按道元既參用馬融王肅之說以西頃為中條嶠家為南條則宜以

汧山為北條地理志右扶風汧縣下云吳山在西古大以為汧山雍州山又總敘云雍州山曰嶽師古曰

即吳嶽也此本周禮鄭康成說而渭水篇注則又引班志在馮翊懷德禹貢北條荆山之支隴山

全氏曰此篇專釋禹貢而隴山非禹貢所及漢志隴西郡下應劭曰有隴坻在其西也師古曰隴坻謂隴

坂即今之隴山汧隴相接道元或因汧及隴本注中贗字其後脫落謬置誤作經文未可知也今改正

終南山惇物山在扶風武功縣西南也頃山在隴西縣

西南

一清按漢志隴西郡臨洮縣禹貢西頃山在縣西南部都尉治縣西句此云西南蓋誤截

禹貢中條山也

嶓冢山在隴西氏道縣之南

南條山也

鳥鼠同穴山在隴西首陽縣西南

鄭元曰鳥鼠之山有鳥焉與鼠飛行而處之又有止而同穴之山焉是二山也鳥名為騭似鷄而黃黑色鼠如家鼠而短尾穿地而共處鼠內而鳥外孔安國曰共為雌雄杜彥達曰同穴止宿養子互相哺食長

大乃止張晏言不相為牝牡故因以名山

積石在隴西河關縣西南

山海經云山在鄧林東河所入也

都野澤在武威縣東北

縣在姑臧城北三百里東北即休屠澤也古文以為
豬野也其水上承姑臧武始澤澤水二源東北流為
一水逕姑臧縣故城西東北流水側有靈淵池王隱

晉書曰漢末博士敦煌侯瑾善內學語弟子曰涼州

城西泉水當竭有甃闕起其上至魏嘉平中武威太守條茂起學舍築闕于此泉太守填水造起門樓與學闕相望泉源陡發重導之斯故有靈淵之名也澤水又東北流逕馬城東城即休屠縣之故城也本匈奴休屠王都謂之馬城河又東北與橫水合水出姑臧城下武威郡涼州治地理風俗記曰漢武帝元朔三年改雍州曰涼州以其金行土地寒涼故也遷于冀

全氏曰按續志涼州刺史治漢陽之隴縣其再遷冀則中葉以後事晉徙治此王隱

晉書曰涼州有龍形故曰卧龍城南北七里東西三里本匈奴所築也及張氏之世居也又增築四城箱各千步東城植園果命曰講武場北城植園果命曰元武園皆有宮殿中城內作四時宮隨節游幸并舊城為五街衢相通二十二門大繕宮殿觀閣采綺妝飾擬中夏也其水側城北流注焉城河河水又東北清澗水入焉俗亦謂之為五澗水也水出姑臧城東而西北流注焉城河河水又與長泉水合水出姑臧

東捐次縣王莽之播德也西北歷黃沙阜而東北流
注馬城河又東北逕宣威縣故城南又東北逕平澤
晏然二亭東又東北逕武威縣故城東漢武帝太初

四年匈奴渾邪王殺休屠王以其衆置武威縣武威

郡治

齊氏召南曰本紀元狩二年置武威酒泉郡志云武威郡太初四年開則不同時矣疑當以紀

為是一清按功臣表昆邪以元狩二年封則志誤也善長又誤仍之王莽更名張掖地

理志曰谷水出姑臧南山北至武威入海屆此水流
兩分一水北入休屠澤俗謂之為西海一水又東逕

一百五十里入豬野世謂之為東海通謂之都野矣

全氏曰漢志武威郡姑臧縣南山谷水所出北至武威入海行七百里道元以為通謂之都野是也
攷蒼柘縣南山柘陝水所出北至捐次入海休屠野都尉治熊水鄯谷水柘陝水熊水皆澤之所入也柘師古曰古松字也陝音下陝反兩山之間也柘陝陝名

合離山在酒泉會水縣東北

合黎山也

一清按元和志合黎山俗名要塗山在張掖縣西北二百里括地志云蘭門山一名

合黎誤行都司志合黎山在甘州衛北四十里迺選至鎮夷所出石硤口三百里一作合離禹貢錐指漢會水縣故城在今肅州衛東北十六國春秋呂光遣呂纂討段業戰于合離羌谷水北至張掖縣合黎山

下與弱水合故因山為名曰
合黎水是合黎水即弱水也

流沙地在張掖居延縣東北

居延澤在其縣故城東北尚書所謂流沙者也形如
月生五日也弱水入流沙流沙與水流行也亦言

出鍾山西行極崦嵫之山在西海郡北

全氏曰此漢獻帝時曹氏

所置之西海郡非新莽置于金城者也

山有石赤白色以兩石相打則

水潤打之不已潤盡則火出山石皆然炎起數丈經
日不滅有大黑風自流沙出奄之乃滅其石如初言

動火之事發疾經年故不敢輕近耳流沙又逕浮屠

歷壑市之國又逕于鳥山之東朝雲國西歷崑山西

南出于過瀛之山

一清按以上所引本之大荒經而有脫失据本文歷壑市又有國曰

汜葉曰鳥山曰淮山曰朝雲之國注中過瀛之山四字不知所出蓋道元旁撮以成文

大荒西

經云西南海之外流沙出焉逕夏后開開上三嬪于

天得九辯與九歌焉

一清按郭璞解上三嬪于天謂獻美女于天帝朱子以為當是

啓夢賓天吳任臣曰夏啓三夢上賓于天謂獻美女之樂如秦穆聽鈞天之奏唐王效霓裳之舞也楚辭啟林賓商九辯九歌正作賓字開即放避漢景帝諱然大荒西經之文曰西南海之外赤水之南流沙之

西有人珥兩青蛇乘兩龍名夏后開闢上三嬪于天
得九辯與九歌焉則非夏啓也道元蓋抄變其詞

又歷員邱不死山之西入于南海

一清按此句員邱二字出郭璞注非

山海經大全氏曰漢志張掖酒泉敦煌多有水道道元不知詳而泛濫于山海經甚矣其蔽也

三危山在敦煌縣南

山海經曰三危之山三青鳥居之是山也廣圓百里

在鳥鼠山西即尚書所謂竄三苗于三危也

禹貢維指曰正

義云三危山必是西裔未知山之所在鄭元引地說曰三危之山在鳥鼠之西南當岷山則在積石之西
南地說乃妄書其言未必可信要之三危山必在河
之南也按水經兩引山海經以證尚書之三危與地

說畧同鳥鼠之西南當岷山則在今臨洮府南岷州
衛北矣又云在積石之西南殊不可曉山南帶黑水
蓋以扶州之黑水出素嶺山入白水者當之也妄言
無疑三危山自當以在沙州者為是肅州舊志云白
龍堆沙東倚三危北望蒲是為西極要路推其地
望可以得三危之形勢矣地理今釋云梁州黑水即
今雲南之金沙江其源發于西蕃諾莫潭五巴什山
分支之東曰阿克達母必拉南至塔城關入雲南麗
江府境亦曰麗水東南流至姚安府大姚縣之左頓
鄉北打沖河自鹽井衛來會之又東入四川境逕會
川衛南又東至東川府西折而東北流逕烏蒙府西
北馬湖府南又東逕敘州府南入岷江雅州黑水出
陝西甘肅塞外南流至河州入積石河今俗名大通
河是也導川黑水即今雲南之瀾滄江其源發于西
蕃諾莫潭五巴什山分支之西曰阿克必拉南流至
你那山入雲南界東岐一支為漾備江東南流分注

大理府之西洱海經流入順寧府境其正支南行絕
雲龍江而東南至雲州北之分水嶺仍與漾備合又
南流至阿瓦國入南海案金沙瀾滄一為梁州之黑
水一為導川之黑水然皆非四大水之黑水也昔人
謂蕃名山川皆以形色西南夷地水色多黑故悉蒙
黑名如打冲金沙瀾滄俱得稱黑水也而真黑水之
源去瀾滄之西三百餘里蕃名哈拉烏蘇色禽經蒙
蕃怒彝獠獠界由緬甸入南海即佛書所謂黑水出
阿耨達山東是也禹迹之所不至蓋中國在阿耨之
之東故名震旦所入大水唯黃河一支可見黑水出
阿耨達之東實在中國之西南未嘗流入內地故從
古無人知其源委也又云案黑水之辨諸家紛如今
考地圖禹貢之黑水有三正不必強合水經注所謂
黑水出張掖離山至于燉煌此雍州之黑水也漢書
地理志健為郡南廣縣注云紛關山符黑水所出北
至梵道入江唐樊綽亦以麗江為古黑水云羅此

北有三危山其水從山南行上流出吐蕃界薛季宣謂瀘水為黑水引鄯道元說黑水亦曰瀘水即若水出姚州徼外吐蕃界中山海經黑水之間有若水是以麗江之說為非不知打冲河至大姚縣即合金沙江會流入岷江薛氏之說原與漢志相合此梁州之黑水也宋程大昌以瀾滄江為黑水李元陽黑水辨亦云隴蜀無入南海之水唯滇之瀾滄足以當之而元史載勸農官張立道使交趾並黑水以至其國吳任臣山海經注亦以瀾滄為古黑水此導川之黑水也蓋雍州之黑水其源在黃河之北梁州及導川之黑水其源皆在黃河之南有截然不相紊者第以張掖燉煌尚在內地可以尋源而求而推其委而不得遂托為越河伏流之說夫崑崙為地軸其山根連延起頓包河南按秦隴直達長安為南山黑水自燉煌而南縱可越大河之伏流其不能越河以南之南山也明矣若狃于雍州三危既宅之說此是言雍州

分域以內今終南鳥鼠皆在河之南而三危更無鳥鼠之南其與雍州之黑水又何涉邪然主瀘水麗江瀘滄之說者亦皆以意度未能確指水之分合不知瀘水麗江源異而流同麗江瀘滄源近而流別分合言之梁州之黑水有兩支而與導川之黑水實出一地也而古未有及之者蓋以二水僻在蕃界隔蔽南山阻與從古未通中國即魏之法顯唐之元奘元世祖之南征邱處機之西遊皆繞出崑崙以外歷西域諸國至于滇南總未嘗經其地但從入中國之支流以古今分域配之料約為某水某水而已今海內一統西南徼外域入版圖爰遣使臣徧歷其地究源討委寫圖以誌支派經路瞭如指掌諸家浮說有所折衷春秋傳曰允姓之姦居于瓜州瓜州地名也杜林

曰敦煌古瓜州也州之貢物地出好瓜民因氏之瓜

州之戎并于月氏者也漢武帝後元年分酒泉置

齊氏

呂南曰本紀分武威酒泉為張掖敦煌在元鼎六年置郡久矣曰後元年者志之誤也

南七里

有鳴沙山故亦曰沙州也

朱圉山在天水北冀城南

即冀縣山有石鼓開山圖謂之天鼓山九州害起則

鳴有常應又云石鼓山有石鼓於星為河鼓星動則

石鼓鳴石鼓鳴則秦上有殃鳴淺殃萬物鳴深則殃

君王矣

岷山在蜀郡湔氐道西

漢書以為瀆山者也

嶓冢山

全氏曰三字誤說見下

在宏農盧氏縣南

是山也穀水出其北林也

全氏曰按嶓冢山當作嶓冢林見山海經且穀水出

宏農黽池與盧氏無涉桑經鄴注于穀水篇悉本山經之舊至此寧遂忘之此篇專釋禹貢山水澤地所在嶓冢林非禹貢之所有篇中獨失去熊耳山則嶓冢二字即熊耳二字簡策零斷行間失次後人率意填寫又假作注文以附會之未可知也漢志宏農郡盧氏縣下云熊耳山在東東近于南不知相懸說地理者當以班志為據

荆山在南郡臨沮縣東北

東條山也

朱氏謀璋箋曰東條未詳一清按禹貢錐指曰漳水注亦引地理志曰禹貢東條荆

山在臨沮縣之東北是六朝漢書誤本道元襲用之耳然既以臨沮之荆山為東條矣顧于嶠冢下云南條山也曾不思禹貢導嶠冢至于荆山本相連屬乎從導汧至敷淺原舊說有三條之目地理志云禹貢北條荆山在懷德南條荆山在臨沮而臨洮之西頃不云是中條既不襲用馬融王肅之說酈氏前遵馬王又雜采班氏然以荆山為東條則大繆矣三條鄭元又分為四列導汧為正陰列西頃為次陰列嶠冢為次陽列岷山為正陽列胡渭曰四列長于三條或嫌其陰陽之名近怪曰陰陽只作南北字用朱子據導字分南北實本康成而又參以一卞和得玉璞于行山河兩戒之謂然則究無東條也

是山楚王不理懷璧哭于其下後玉人理之所謂和

氏之玉焉

内方山在江夏竟陵縣東北

禹貢注章山也

顧氏祖禹曰章山在安陸府東四十里古文以為内方山左傳定四年蔡

侯吳子唐侯伐楚捨舟于淮汭自豫章與楚夾漢圖經云豫章即章山也一名障山晉太安二年華宏討

義陽賊張昌于江夏敗于障山即此

大別山在廬江安豐縣西南

一清按大別是魯山即外古翼際山不在安豐也

方山崧高是也

一清按漢志云古文以崧高為外方山此條與首條參互

桐柏山在

南陽平氏縣東南陪尾山在江夏安陸縣東北

一清按胡渭曰

禹道陪尾實為泗水泗出陪尾見博物志然則不在江夏安陸也

衡山在長沙湘南縣

南

禹治洪水用白馬祭衡山於是得金簡玉宇之書按

省玉宇得通水利也

九江地在長沙下雋縣西北

全氏曰據漢志九江在廬江尋陽縣南王伯厚謂以

九江為洞庭本于水經胡晁曾因之指此條也予觀經之所據當是楚地記所云巴陵瀟湘之淵在九江之間者也善長注曾不及之寧有遺忘其疏九江專主劉歆湖漢九水之說一見于江水篇再見于贛水篇至湘水

篇絕不以九江與之將無謂善長于經有異同耶則宜
糾正之矣今不論列一言何也夫九江與東陵相首尾
以九江為湖漢則東陵當在廬江以九江為洞庭則東
陵當在巴陵無兩可也今水經云九江在長沙下雋而
又云東陵在廬江金蘭自相矛盾有是理乎殆不學之
人見行間脫爛從而妄補之而不能掩其敗闕也至于
九江之不當為洞庭則夏柯山已疑之而胡梅磧尤疑
之北宋以來大儒數十輩考正審定而終不得其是抑
九江固不可以言地若九江地果是經文則如大任地
善長亦必指其失也一清按全氏之說甚辨但此條決
非後人添補道元專附班固故不以洞庭為九
江而又不取顯斥水經存而不論未可知也

雲夢澤

在南郡華容縣之東東陵地在廬江金蘭縣西北

一清按漢

志廬江郡下云金蘭西北有東陵鄉顧祖禹曰金蘭縣
亦見漢志蘇林注檢今本漢書注非蘇林也又曰或以

為三國魏所置縣晉廢蓋在大蘇山東胡渭曰金蘭漢初有是縣中廢故志不書晉宋間復置故鄆注據以為言當在固始西南南直黃梅之北矣今考善長注所說金蘭縣見決水篇而晉宋志則又無之宛溪東樵所言均未

的也

敷淺原地在豫章歷陵縣南

一清按漢志豫章郡歷陵傳陽山傳陽川

在南古文以為傳淺原而水經不載此川

彭蠡澤在豫章彭蠡縣西北

尚書所謂彭蠡既豬陽鳥攸居也

中江在丹陽蕪湖縣西南東至會稽陽羨縣入于海震

澤在吳縣南五十里北江在毗陵北界東入于海

一清按水

經此條是本漢志以成書非禹貢之三江也班志會稽郡吳縣下云其區澤在西古文以為震澤南江在南東

入海揚州川以震澤為南江殆是誤讀班書耳酈道元
沔水注亦以其區為南江且合石城分江水為一條蓋
承其繆孔安國導江傳云有北中有南可知導漾傳云
自彭蠡江分為三入震澤夫彭蠡未嘗分為三也且亦
未嘗入震澤也夫江流祇一川耳禹貢漾水下之北江
即江水下之中江所謂江漢朝宗于海者也故師古于
北江曰自彭蠡江分為三遂為北江而入海又于中江
下云亦自彭蠡出班志之所謂中江出蕪湖西南至陽
羨入海者的是後來人力為之斷非禹迹也禹貢錐指
曰蘇氏曰豫章江入彭蠡而東至海為南江岷江江之
經流會彭蠡以入海為中江漢自北入江會彭蠡為北
江蘇氏之說人或疑之及閱徐堅初學記引鄭康成書
注以證三江曰左合漢為北江右會彭蠡為南江岷江
居其中則為中江故書稱東為中江者明岷江至彭蠡
與南北合始得稱中也始知蘇氏所說東漢時固已有
二一

韋昭注云三江松江錢塘浦陽江也又范蠡曰與我爭
三江五湖之利者非吳邪三江亦當從韋解然此但可
以解國語耳水經沔水下篇注引郭景純曰三江者岷
江松江浙江也愚謂以此當國語之三江更長于韋何
也漢志毗陵縣季札所居北江在北是岷江正環吳之
境而韋獨遺之鄒元云浙江于餘暨東合浦陽江是浦
錢塘渾濤入海而韋強分為二故以岷易浦陽較長也
然終不可以釋禹貢蓋松江乃震澤之下流以松江為
中江浙江為南與導水之大相背戾矣又曰職方氏荆
州曰其川江漢揚州曰其川三江與禹貢同蓋荊州未
會彭蠡故但稱江漢及至揚州則江漢與
彭蠡參會故有三江之目二經若合符節
邳縣之西羽山在東海祝其縣南也

縣即王莽之猶亭也

一清按此文與
淮水篇複出

尚書殛鯀于羽

山謂是山也山西有羽淵禹父之所化其神為黃龍以入淵矣故山海經曰洪水滔天鯀竊帝之息壤以堙水不待帝命帝令祝融殺鯀羽郊者也

陶邱在濟陰定陶縣之西南

陶邱邱再成也

荷澤在定陶縣東雷澤在濟陰成陽縣西北荷水在山

陽湖陸縣南

全氏曰荷澤在定陶班志語也荷水在湖陸孔傳及許氏說大語也二河有上下之

分故水經兼引之而胡渭曉曉于此抑昧矣

蒙山在太山蒙陰縣西南大野

澤在山陽鉅野縣東北大邳地在河南成皋縣北

爾雅曰山一成謂之邳然則大邳山名非地之名也

明都澤在梁郡睢陽縣東北

一清按漢志梁國睢陽縣禹貢盟諸澤在東北益

州沱水在蜀郡汶江縣西南其一在郫縣西南皆還入

江荊州沱水在南郡枝江縣

全氏曰汶江縣之沱為閼明所鑿埤縣之沱是瀕壩

江李冰所堰皆非禹迹也顧祖禹嘗疑之而不能指沱之所在豈益州無沱水乎予謂江水篇都安縣下注云

郫江水出焉武陽一下注云郫江水入焉郫江出江入江與沱義合禹貢雖指亦曰江原縣郫江水近世謂之

大旱江者岷江之正流而班氏以為首受江故鄭康成云沱之類以此當禹貢梁州之沱或庶幾焉荊州之沱

惟枝江足以當之一清按全氏此言亦未的梁荆二州之沱當主夷水故皆有沱潛既道之文而導江云東別為沱又東至于澧直以江沱與澧水相接連而三澧池導澧下不別出沱水是具明證也詳見夷水篇

在南郡郎縣之北

禹貢雖指曰水經三澧池今本作地字為是然自鄴元時已為觀注云池

流可見傳寅集解引此亦作池明地字乃近世所改一清按水經自明正嘉以來屢經各家校刊改池為地池雖誤文實古本也故不从俗改作地字耳

尚書曰導漢水過三澧地說曰沔水東行過三澧合流觸大別山阪故馬融鄭元王肅孔安國等咸以為三澧水名也許慎言澧者埤增水邊土人所止也按

春秋左傳曰文公十有六年楚軍次于勾瀝以伐諸庸宣公四年楚令尹子越師于漳瀝定公四年左司馬戍敗吳師于雍瀝昭公二十三年司馬遂越縊于蓬瀝服虔或謂之邑又謂之地京相璠曰杜預亦云水際及邊地名也

一清按春秋成十五年傳則決睢瀝杜預注曰瀝水涯

今南

陽涑陽二縣之間涑水之濱有南瀝北瀝矣而諸儒之論水陸相半又無山源出處之所津途關路唯鄭元及劉澄之言在竟陵縣界經云郎縣北池然池流

多矣而論者疑焉亦不能辨其所在

一清按此篇惟釋禹貢山水澤

地所在不及其他而忽出池字所以後人改三澁池為三澁地也索隱引水經亦云三澁地名今竟陵有

三澁水俗云是三澁水參音去聲方輿紀要亦曰三

澁水在景陵南三十里漢讀曰又即禹貢三澁故地

也最為低窪然道元又明明注為池字則非傳寫之

誤可知而不能正其繆殆強弩之末博學好奇或未

致思

耳

右禹貢山水澤地所在凡六十

全氏曰按六十之目芟去隴山之誤大改正璠

冢山之訛字釐定三澁池之標目斯為昭合前人讀水經注者至此大氏以將畢業神疲力索不復細討于是

隴山竄入熊耳喪職而三澁

池且為寄公矣可發一笑也

水經注釋卷四十